



**Republika e Kosovës**  
Republika Kosovo - Republic of Kosovo

**Memorandum Bashkëpunimi**  
**në mes:**

1. Këshillit Gjyqësor të Kosovës (KGJK)
2. Prokurorit të Shtetit (PSH)
3. Policisë së Kosovës (PK)
4. Komisionit Qendror të Zgjedhjeve (KQZ); dhe
5. Panelit Zgjedhor për Ankesa dhe Parashtresa (PZAP)

**Lidhur me Zgjedhjet Parlamentare 2014**

**Neni 1**  
**Qëllimi**

Qëllimi i këtij Memorandumi të Bashkëpunimit është ngritja e bashkëpunimit dhe koordinimi në mes të KGJK-së, PSH-së, PK-së, KQZ-së dhe PZAP-it në ndërmarrjen e aktiviteteve për luftimin me sukses, përfshirë parandalimin, e të të gjithë atyre që bien në kundërshtim me dispozitat e ligjit në fuqi lidhur me veprat penale kundër të drejtave të votimit.

**Neni 2**  
**Obligimet e KGJK dhe gjykatave**

1. Të gjitha rastet e pranuar nga Prokuroritë e Kosovës lidhur me keqpërdorimet në zgjedhje do të trajtohen nga gjykatat si lëndë me prioritet;
2. Gjykatat në bashkëveprim me KGJK do të sigurohet në ekzekutimin efikas të të gjitha vendimeve lidhur me rastet që dalin si rezultat i procesit të zgjedhjeve.

### **Neni 3**

#### **Obligimet e PSH dhe Prokurorive**

1. Prokuroritë do të dërgojnë të KQZ të gjitha informatat për të gjithë personat e hetuar dhe akuzuar nga Prokuroritë e Kosovës lidhur me procesin e zgjedhjeve 2010 dhe procesin e zgjedhjeve 2013.
2. PSH në mënyrë aktive do të ndërmarrë aktivitete dhe masa gjatë tërë procesit të zgjedhjeve në hetimin dhe ndjekjen penale të të gjithë atyre që bien ndesh me dispozitat e ligjit lidhur me veprat penale kundër të drejtave të votimit dhe të gjitha formave tjera të krimit që ndërlidhen me procesin e zgjedhjeve.
3. PSH do të organizojë trajnime lidhur me veprat penale kundër të drejtave të votimit për të gjithë prokurorët që do të caktohen kujdestarë dhe përgjegjës gjatë procesit zgjedhor. Trajnimet do të organizohen menjëherë pas nënshkrimit të këtij memorandumi.
4. PSH do të angazhon në punë të gjithë Kryeprokurorët dhe prokurorët e Prokurorive Themelore së bashku me stafin tjetër mbështetës që ditën e zgjedhjeve të punojnë njëjtë me orar sikurse gjatë ditëve të tjera të punës.
5. Zyra e Kryeprokurorit të Shtetit mund të nënshkruaj Memorandum Bashkëpunimi me OJQ -te dhe Shoqërinë Civile të specializuara për procesin zgjedhor,

### **Neni 4**

#### **Obligimet e PK**

1. PK do të ngritë kapacitetet e saja në nivel të duhur dhe të ndërmarrë veprimet konkrete në rastet e keqpërdorimeve gjatë gjithë procesit të zgjedhjeve.
2. PK do t'i përgjigjet urdhrave të prokurorëve në mënyrë efikase si dhe kërkesave të institucioneve tjera përshtirë ankesat e qytetarëve.
3. Në bazë të Ligjit për Zgjedhjet e Përgjithshme nr. 03/L-073, neni 84, përcakton Sigurinë në Vendvotime, më saktësisht paragrafi 84.2, i këtij ligji parasheh intervenimin e Policisë me kërkesë të Kryetarit të Komisionit të Vend të Votimit-së në vendvotim në rast të ndonjë incidenti të mundshëm. Policia menjëherë njofton Prokurorin e Shtetit dhe procedon lëndën sipas kërkesës/urdhrit të së njëjtës. Incidentet e mundshme gjatë procesit zgjedhor përveç shënimit zyrtar në

librin e votimit, Policia obligohet për të njëjtat të mbajë/evidentoj të gjitha shënimet e nevojshme për një procesim sa më kualitativ të veprave të kësaj fushe.

### **Neni 5 Obligimet e KQZ**

KQZ gjatë tërë procesit të zgjedhjeve do të koordinoj aktivitetet e saj me KGJK, PSH, PK dhe PZAP.

### **Neni 6 Obligimet e PZAP**

1. PZAP-i do t'i koordinoj aktivitetet e tij gjatë tërë procesit zgjedhor me KQZ.
2. PZAP-i, do ti koordinoj aktivitetet e tij gjatë tërë procesit zgjedhor me Policinë e Kosovës (PK), sidomos gjatë periudhës së fushatës zgjedhore dhe gjatë ditës së votimit.
3. PZAP-i, pas marrjes së vendimit përfundimtar, do t'i koordinoj aktivitetet e tij me Prokurorin e Shtetit në kuptim të dorëzimit të rasteve/lëndëve ankimore që kanë të bëjnë me elemente të veprës penale.

### **Neni 7 Procedurat Standarde të Veprimit ndërmjet PK-së dhe PSH-së**

1. PK dhe PSH obligohen të përpilojnë "Procedura Standarde të Veprimit" (PSV) në kuadër të legjislacionit penal dhe praktikave më të mira, me qëllim të fuqizimit të bashkëpunimit për të shfrytëzuar me efikasitet mjetet në dispozicion për të hetuar, ndjekur dhe luftuar çdo veprim për të manipuluar procesin e zgjedhjeve.
2. Koordinatorin i caktuar nga Policia dhe PSH do të sigurohen në zbatimin e PSV-ve.

## **Neni 8**

### **Obligimet e përbashkëta**

1. KGJK, PSH, PK, KQZ dhe PZAP do të miratojnë Planet e Veprimit jo më larg se 7 ditë pas nënshkrimit të këtij memorandumi.
2. Institucionet e lartpërmendura do të sigurohen që planet e tyre të veprimit të jenë të harmonizuara.
3. KGJK, PSH, PK, KQZ dhe PZAP do të punojnë në mënyrë aktive rreth sensibilizimit të opinionit publik në nivel lokal dhe qendror për pasojat, rreziqet që ndërlidhen me veprat penale kundër të drejtës së votimit, si dhe veprat e reja penale të ashpërsuara të përfshira në Kodin e ri Penal.
4. KGJK, PSH, PK, KQZ dhe PZAP në vazhdimësi do të grumbullojnë informata dhe do të prodhojnë raporte gjithëpërfshirëse, duke përfshirë statistikore dhe të përditësuara rreth mbarëvajtjes së procesit të zgjedhjeve dhe veprimeve të këtyre institucioneve përkatëse, të cilat do të prezantohen para opinionit publik.
5. KGJK, PSH, PK, KQZ dhe PZAP do të bashkëpunojnë ngushtë me Organizata Jo-Qeveritare (OJQ), shoqërinë civile dhe mediat për zbatimin e pikës 2 dhe 3 të këtij neni.

## **Neni 9**

### **Koordinatorët**

1. KGJK, PSH, PK, KQZ dhe PZAP do të caktojnë nga një koordinator që do të kujdesen për zbatimin dhe vlerësimin e zbatimit të këtij memorandumi.
2. Kryeprokurori i Shtetit emëron Koordinatorin Nacional nga radhët e Prokurorit të Shtetit.
3. Koordinatorin Nacional do të kujdeset për përgatitjen e raportit gjithëpërfshirës lidhur me rastet që mund të dalin si rezultat i procesit të zgjedhjeve.

## **Neni 10**

### **Bashkëpunimi me EULEX**

KGJK, PSH, PK, KQZ dhe PZAP do të bashkëpunojnë dhe koordinohen ngushtë me EULEX-in gjatë tërë procesit të zgjedhjeve.

**Neni 11**  
**Dispozitat kalimtare**

Ky Memorandum i Bashkëpunimit do të përfundojë së zbatuari në momentin e zgjidhjes të të gjitha rasteve para gjykatave me aktgjykim të formës së prerë dhe ekzekutimit të vendimeve.

**Neni 12**  
**Hyrja në fuqi**

Ky Memorandum i Bashkëpunimit hyn në fuqi ditën e nënshkrimit.

Datë: 15.05.2014

*Pis*  
Ismet Kabashi  
Kryeprokuror i Shtetit

Valdete Daka  
Kryetare e KQZ

Enver Peci  
Kryesues i KGJK

Shukri Sylejmani  
Kryetar i PZAP

Shpend Maxhuni  
Drejtore i PK